

Gun is-urursatey iyo Gob aamustey

"Wax Siyaasaddii loo igmadey silic ku nooshiye
Markii talada habro saar leh iyo sebiyo lo doortay
Ayay sayn-caddaa iyo waxgarad sibi q dhaqaaqeene"

Abwaan Axmed Ismaaciil Qaasim AHN)

"Africa's problems is a failure of leadership. Because what we do is to elect thieves. We elect hyenas to take care of goats and when the goats are consumed, we wonder why."

By Patrick Lumumba

Maahmaah baa tidhaahda saaxiib ku hakradey ayaa ka liita cadaw ku hadimeeyey (A silent friend is worse than a vocal enemy). Waxaa halkaa ka cad in ay bulsho dhan u horseedi karto dhibaato iyo burbur marka runta oo laga aamuso: Danta guud loo hadli waayo; Danta gaarka lagu hago hanka caloosha ; Baahida ummada la iska dhaga tiro; Dalka dibindaabyadiisa laga shaqeeyo; Mucaarid hawlgab noqdo bulshadana u habarwacda; muxaafidna is hanbalyeeyo; Hantidii qaranka jeebka lagu sii wada qaato; Dan yarta la hagoogo.

Dalka Soomaaliland in badan ayuu dhibaato lala doonay ka gudbay. Mar kasta dad baa u kacayey oo dhiig iyo dheefba u hurayey si dalku u badbaado. Gu'gii 1960 ayuu hogaamiyayaashii ururkii SNL ay ka galeen dalka Soomaaliland gef,aynu u hogaamiyeen huq iyo hagardaamo ku qaadatey muddo 30 gu' inuu haybadiisii la soo noqdo. Ururka SNL waxaa xilligaa hogaaminayey Maxamed Xaaji Ibraahin Cigaal (IHUN) oo dalkan Soomaaliland-na madaxweyne ka noqday. Isagoo ka hadlayo sababta isagoo ogaa in aan Xamar nololi oolin, uu Somaliland ula doontay meel baasta,ugana aamusay wuxuu yidhi: *"Iraaddada shacbiga ayaa shalayna lagu tagay, koobiyo sagaashankiina lagaga soo noqday, oo lagaga yimi, Dhagax bay ahayd lixdankii, koobiyo sagaashankiise takniko iyo suuse ayay ahayd. Suu iyo Kalaankishoof baa la isla barbar taagnaa. Cara soo baxa ayay ahayd idinkoon ku dhawaaqin"*.

Maalintaa ummada wuu hor kacey oo uu u raacey Xamar, hase yeeshee wuxuu Madaxweyne Cigaal (IHUN) maalintan sheegay inaanu raaceyn: *"Haddaad israacdaan, oo Illaahay kama dhigo e(AAMIIN), aad tidhaahdaan caalamkii baa nagu yar dhago adaygayoo, wixii socon maayaane bal hadda xagii aynu eegno tidhaahdaan, ma idin raacayo, anigu waan idinka hadhayaa (Sacab). Hargeysa, Burco, Berbera iyo Laascaanood oo laga xukumo Xamarna, dagannaan maayee waan ka haajirayaa (Sacab).*

Bishii Maarso, 1991 ayaa dad badani ku sii qulqulayee magaalada Burco. Waxaa soo gabagaboobey heshiisyo dhex marey dhamaan beelaha Soomaaliland wada degga. Waxaa la iskugu imanayey shir loo wada dhan yahay si looga tashado aayaha bulshada reer Soomaaliland, iyadoo dib u eegis lagu samaynayo wixii la soo marey lixdankii ka hor iyo lixdankii ka dib. Axmed Maxamed Siilaanyo oo ka mid ahaa dadkii xilligaa Burco joogay ayaa si fiican u ogaadey in shirkaasi uu ka soo bixi doono go'aan ah "Somaliland wuxuu go'aansadey in uu gooni isku taago, lana soo noqdo haybadiisii qaranimoo ee ay u boqno gooyeen shanta Soomaaliyeed oo iminka ah hal-bacaad lagu lisay".

Go'aankaasi aad buu ula qadhaadhaadey Axmed Maxamed Siilaanyo. Sidaas darteed wuxuu is yidhi ka hor deg oo dadkan u sheeg waxaad maagan tahay. Wuxuu yeelay siduu yeeli jiray marka arin ku qadhaadhaado. Wuxuu u baqoolay carigiisii iyo gurigiisii ku yaaley Ingiriiska. Ka dibna, wuxuu soo qoray warqad uu ku taageerayo in la sameeyo dawlad ku-meel gaadh ah oo midaysa Somaliland iyo Soomaaliya. Go'aanka la filayo inuu shirkaa Burco ka soo baxana wuxuu ku tilmaamey mid lagu degdegayo.

Sidoo kale ayuu horaantii gu'gii 2010^{kii}, Madaxweyne Axmed Siilaanyo oo ahaa markaa gudoomiyaha Mucaaridku sii xaqijiyey "Anigu runtii xataa waraaq aan qoray baa jirtay oo anigu aan barigaa soo jeediyey haddii dalka la xoreeyo in si federal ah lagu dhaqmo, qaab federal ahi uu yimaado, oo qoraal aan qarsoodi aheyni way jirtay dee anigu aan barigaa diyaariyey, waqti aanu golaha (SNM) u soo jeedinayna waa jiray"...

Caku mudanahaygii	Mooryaantu dhaantoow
Dhiig miirtihiiyoow	Kii loo mashxaradee
Isna nagu maqnaayee	Quus nagu macsuumoow.
Maxastiyo Adduunkii	Macaluul ku nooshiyo
Wadhatada miskiinta ah	Laga faro maroojiyey,
Sawtaad malaayiin	Moohaar ku gurateen,
Iimaan macbuud baa	Uur madhane buuxshee
Xaaraanta maandhoow	Ma mahadin hortaa jire.

Maansadii "Mooryaan" ee Weedhsame

Dalka Soomaaliland wuxuu ku hano-qaadey laba arimood oo ah Nabad iyo Talo-wadaag. Dawladu heshiis way la gali kartaa dawlado kale, hase yeeshee dastuurka Soomaaliland wuxuu dhigayaa in la hor keeno golaha wakiilada oo ah golaha sharci dajinta dalka. Sidoo kale in la siiyo muddo ay kaga doodaan, qof kasta la dhageysto wuxuu ku diidayo ama ku doonayo. Dastuurka Soomaaliland meelna kagama taalo “ ku jujuub, ku jiqsii, askariga adeegso, iyo xabsiga u taxaab”.. Qoor qabad qoolay biyo kuma qudhqudhiso....

Ninka samaha diidee seefta xumaha qaatoow

Dalka salal colaadeed iyo kulayl sii siyaadiiyo

Salow baad ku oogtoo Dimuqraadi saxaha

sifaheedii laabtoo kaligii talis sad moodee

horta yaa la sirayaa

Waxa kale oo maalmahan dalka Soomaaliland hadal-heyntiisu ku badan tahay doorashada ka dhacdey Xamar iyo ninka loo cumaamadey. Taa waxaan kaga baxayaa odhaahda suuban ee dad dhawr ahi oo dalka Soomaaliland-na daneynayaa ay yidhaahdeen ee ah “*Farmaajiyo maxaa iiga dana farax la goohiisa*”.

Waxaann idinla wadaagayaa weedh uu wiil dhalinyaro ahi la wadaagey bulshada Soomaaliland ee uu daneeyo. Waxaanu yidhi waa Muuse Dalmar oo dareenkiisa ka dhiibanaya xaalada dalku maanta marayo: “Dhallinyaradeenu uma baahna in lagu beero cadaawad ay u qabaan Itoobiya, waxa se ay u baahan yihiin in hankooda la gaadhsiiyo sidii ay mandaqadda geeska Afrika iyo dunidaba ugu talin lahaayeen. Maanta dunida, waxa laysku muquuniyay waa aqoon iyo dhaqaale, balse maaha isir nacayb, hiif iyo seeflaboodnimo caadifadaysan. Hiilka ugu weyn ee uu qofku dalkiisa u gaysan karaa waa isaga oo ka soo baxa waajibka qaran ee saran”.

Waxaan ku soo gabgabeynayaa dhacdo la yaab leh oo si xeeldheer uga waramaysa mushaharka ay golayaasha (wasiirada, wakiilada,garsoorka iyo guurtida) ku damaashadaan ee ay caruurtooda ku quudiyaan halka uu ka soo baxo.

Cabdicasiis Maxamed Iid oo isagoo ardey ah dalkan inuu u halgamo u boqno gooyey waxbarashadiisii, maantana waqti badan galiyey sidii loo meelayn lahaa xasuuqii ka dhacey dalka ayaa bulshada reer Soomaliland la wadaagaya : “ *Islaan aan khudrada ka iibsado oo*

fadhiisata xafiiskii hore ee badhisaabka Hargaysa ayaan waydiiyey inay cashuur bixiso iyo inta qof ee ay ka biiliso kaadhiyoonaa. Waxay tidhi 7 qof ayaan halkan ka masruufaa, cashuur dhowr kun ah iyo baad-yarna waan bixiyaa, subaxiina waxaan kacaa 5^{ta} subaxnimo oo kaariyoonahaa kaga soo qaadaa suuqa Gobanimo khurada, dabadeed waan soo riixaa ilaa halkan.

Qiyaastii waa 2-3 miles. Waxay intaa iigu dartay "Alxamdulillah Hooyo". Waxaan la macaamilaayey ilaa 2 sano hadda waanan yar naasnuujiyaa.

Islaantii maalintii danbe ayaan waayey show lug baabay ka jabtay! Allaa adoomihiisa risiqee markiiba waxa igu soo dhacday follow 7 dii qof yaa biilin. Maalin danbe ayaan arkay iyadoo lugtu xidhantay oo halkii fadhida waananu is waraysanay waxaanay ii sheegtay in aanay socon karin oo nin Abooya uu kaariyoonaha u riixo lana qaybsaday wixii yaraa ee macaashka ahaa, haddana waxay ku xigiisay intaas "Alxamdullilaah" waanu fiicanay. Waxaa hubaal ah inay tahay qof iimaan leh Allena aaminsan.

Dadka islaantaas cashuurteeda iyo xaqa ay waddanka ku leedahay ee dhul ah, deked ah, military base ah, iyo wixii kalee la iibsadayba cunaaya. Alloow haygeen halkay joogaan qiyaamaha. Sun iyo Waabay ayey cunaayaan markaasayno leenahay abaarbaa nahaysa, dowladii ayaa sidana iyo wax la mida. Denbigeenii ayuun baa laynoo karkariyey. Ma jeclayn inaan negative noqdo ee way ka maaransiin wayday”

Afbaa lagu ciil baxaa,	gacan baa lagu aarsadaa,
Talaa oday lagu noqdaa,	runbaa umad lagu dhaqaa
ilayskaa kuwii shidow	abaa baan kuu hayaa
agoontaa ninkii qadshaw	inkaar baan kugu ogahay

Tixraac:

-Khudbadii Madaxweyne Maxamed Xaaji Ibraahin(IHUN) ka horjeediyey golayaasha 17kii Diisember 1997kii is-casilaadisii..

-Wareysi Gudoomiye Axmed Maxamed Siilaayo – Safarkii Maraykan

Hadhwanaagnews - Janaanyo 1, 2010

-Qoraalo ku jira kaydka Mareegta Farshaxan

Qalinkii: Fu,aad Sheekh

Bahda Mareegaha Farshaxan

www.farshaxan.com iyo www.farshaxan.org